



# **LAPORAN LIPUTAN MEDIA**

**RABU / 12 JUN 2019**

- 1. SAWAH TERJEJAS DAPAT PERHATIAN**
  - **SINAR HARIAN**
- 2. PERTANIAN MODEN TANAMAN KONTAN TINGKAT PENDAPATAN**
  - **BERITA HARIAN**

**DISEDIAKAN OLEH :**

**CAWANGAN KOMUNIKASI KORPORAT**

**( MADA )**

# KERATAN AKHBAR : SINAR HARIAN

TARIKH : 12 JUN 2019

PERKARA : PERTANIAN

## Sawah terjejas dapat perhatian

**MADA siasat dakwaan projek Muda III tidak efektif**

NURUL HIDAYAH HAMID

ALOR SETAR

**M**asalah tanaman terjejas dialami ratusan pesawah di Sanglang, dekat sini, yang mendakwa berpunca daripada pembangunan projek Muda III mendapat perhatian Lembaga Kemajuan Pertanian Muda (MADA). Timbalan Pengurus Besar (Teknikal) MADA, Syed Zainuddin Syed Zain berkata, pihaknya telah menja-

lankan siasatan berhubung dakwaan pesawah di Sanglang berhubung Projek Muda III didakwa tidak efektif.

Katanya, MADA dan Jabatan Pengairan dan Saliran (JPS) Muda telah mengadakan pertemuan untuk berbincang dan menyelesaikan isu itu dengan pesawah terbabit di Kampung Matang Kerengga, dekat sini, kelmarin.

Menurut beliau, siasatan mendapati reka bentuk dan pembinaan beberapa laluan parit sebagai dwi fungsi pada asalnya telah dijadikan satu fungsi.

"Melalui siasatan, jajaran tali air tersier (konkrit) dan laluan bekalan air telah dijadikan sebagai satu fungsi sahaja.

"Untuk itu, pesawah

perlu membuang air di parit tersier (parit bawah) di bahagian hujung lot," katanya dalam satu kenyataan semalam.

Menurutnya, isu tali air tersier (konkrit) rendah dari aras batas sawah telah dimaklumkan kepada JPS, yang mana ia kini dalam peringkat siasatan dan tindakan.

Syed Zainuddin berkata, JPS Muda juga telah memaklumkan kepada kontraktor bahawa keadaan status quo sedia ada di tapak perlu dikekalkan.

Sehubungan itu, menurut Syed Zainuddin, pihak kontraktor akan menyelesaikan isu berkenaan dengan kadar segera.

Katanya, Pembangunan Sistem Pengairan Tersier di kawasan berkenaan akan

info

**Pihak MADA, JPS telah bertemu pesawah di Kampung Matang Kerengga, kelmarin**

memberi manfaat positif kepada pesawah apabila ia siap kelak.

"Cuma, beberapa isu semasa perlu diselesaikan sementara pembinaan projek itu berjalan di kawasan berkenaan," katanya.

*Sinar Harian* sebelum ini melaporkan kekecewaan ratusan pesawah dari Kampung Matang Kerengga, Lana Bulu, Sanglang, Batas Bengkok, Lubuk Pinang dan Teluk Gelam berkaitan Projek Muda III didakwa tidak dilaksanakan secara efektif.

**Pesawah dakwa projek Muda III tak efektif**



Pesawah mendakwa projek Projek Muda III tidak dilaksanakan secara efektif.

A A

SANGLANG - Ratusan pesawah di enam kampung kawasan ini yang terlibat dengan pembangunan Projek Muda III kecewa apabila ia tidak dilaksanakan secara efektif.

Antara kampung berkenaan ialah Matang Kerengga, Lana Bulu, Teluk Gelam, Sanglang, Lubuk Pinang dan Batas Bengkok.

Laporan *Sinar Harian* 9 Jun yang menyiaran aduan pesawah yang mendakwa Projek Muda III tidak efektif kepada mereka.

12/6/2019 Sinar Harian

Rabu, 12 Jun 2019 **BH**

# Pertanian moden tanaman kontan tingkat pendapatan

Langkah elak pesawah terus miskin, tidak bergantung subsidi: PM

Oleh Irwan Shafrizan Ismail dan Hazwan Faizal  
bhnews@bh.com.my

Putrajaya



Dr Mahathir bersama Mohamed Azmin dan Saifuddin (kanan) pada sidang media di Bangunan Perdana Putra, Putrajaya, semalam.

Kerajaan mengenal pasti beberapa langkah untuk menangani kemiskinan pesawah yang selama ini bergantung kepada pemberian subsidi, kata Tun Dr Mahathir Mohamad.

Perdana Menteri berkata, ia adalah dengan meningkatkan kaedah pertanian secara moden selain menggalakkan pesawah memperuntukkan sebahagian tanah mereka untuk tanaman kontan seperti sayur-sayuran dan buah-buahan bagi meningkatkan pendapatan.

"Selama yang kita tahu, penanam padi adalah golongan miskin dan mereka bergantung kepada subsidi kerajaan. Kita kenal pasti beberapa perkara yang menyebabkan mereka terus dalam garis kemiskinan.

"Pertama, mereka mempunyai *holding* (keluas sawah) terlalu kecil untuk memberi pulangan baik dan kedua, mereka tidak efisien," katanya pada sidang media selepas mempengerusikan mesyuarat Majlis Tindakan Ekonomi (EAC) Bil 3/2019 di sini, semalam.

Yang turut hadir, Menteri Hal Ehwal Ekonomi, Datuk Seri Mohamed Azmin Ali; Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail; Menteri Pertanian dan Industri Asas Tani, Datuk Salahuddin Ayub dan Pengerusi Permodalan Nasional Bhd, Tan Sri Zeti Akhtar Aziz.

Dr Mahathir memberi contoh, sawah seluas 0.4 hektar boleh mengeluarkan lapan tan hasil, tetapi yang berlaku cuma empat tan hasil dikeluarkan.

**Subsidi RM1.8 bilion**

"Jadi, pesawah perlu meningkatkan kaedah penanaman dan cara penggunaan baja. Kerajaan terpaksa bagi subsidi setahun RM1.8 bilion kepada 200,000 pesawah. Ini satu kos yang tinggi," katanya.

Beliau berkata, kerajaan mahu pesawah dapat menghasilkan pengeluaran lebih banyak bagi setiap hektar dan pada masa sama, mahu menangani masalah kemiskinan penanam padi yang boleh meningkatkan pendapatan dan merajana pulangan lebih baik dengan menanam tanaman alternatif.

"Umpamanya, tanaman kontan yang boleh dituai tiga atau empat kali setahun, yang memberi pulangan lebih baik berbanding padi. Tanaman padi di Kedah dituai dua kali setahun, tapi tempat lain sekali sahaja, jadi pendapatan mereka berkurangan, sebab itu kita perlu melihat perkara ini secara menyeluruh.

**Jaga keselamatan bekalan makanan**

"Kita mesti menjaga keselamatan bekalan makanan. Kita perlu mengenal pasti bidang yang boleh dilakukan untuk sekurang-kurangnya membantu petani meningkatkan pendapatan dan pada masa sama, tidak membebankan kos kepada pengguna. Harga pengguna tidak boleh naik untuk menambah pendapatan petani," katanya.

Dr Mahathir berkata kerajaan mahu mengkaji bagaimana pesawah yang efisien boleh menghasilkan lapan tan setiap 0.4 hektar dan menggunakan sistem mereka serta sistem lain untuk meningkatkan produktiviti pesawah.

"Sekiranya kita boleh mendapat lebih banyak lagi melalui penanaman tanaman lain seperti sayur-sayuran dan buah-buahan seperti harum manis (mangga), nanas dan semua itu boleh memberi pulangan yang lebih baik," katanya.

Sementara itu, EAC dalam satu kenyataan, memaklumkan mesyuarat EAC semalam, bersetuju menghidupkan semula Majlis Produktiviti Negara (NPC) bagi menetapkan panduan dan hala tuju strategik serta macu agenda produktiviti negara secara menyeluruh.

"Keanggotaan NPC akan disusun semula supaya keahliannya terdiri daripada mereka berpengalaman dan berkepakaran untuk mengenal pasti isu dan masalah produktiviti di semua peringkat," katanya.